

CHET TILLARINI O'RGANISHNING TEZ VA SAMARALI YO'LLARI

Muxammadiyeva Risola

Navoiy davlat pedagogika institute ingliz tili va adabiyoti
kafedrası o'qituvchisi

Janzakova Nurasel G'ani qizi

Navoiy davlat pedagogika instituti ingliz tili va adabiyoti fakulteti
2 bosqich talabasi

Annotatsiya

Maqolada chet tillarini qanday o'rganishni boshlash va qanday qilib tez va samarali o'rganish usullarini ko'rsatib o'tilgan. Shuningdek, til o'rganishda innovatsion texnologiyalarning roli haqidagi ma'lumotlarni olish mumkin.

Kalit so'zlar: interaktiv metod, motivatsiya, interaktiv suhbat, individual, "Wisdom dictionary", "OALD", struktura.

Barchamizga ma'lumki bugungi rivojlanib borayotgan taraqqiyot davrida chet tillarni bilish eng dolzarb masalalardan biri hisoblanadi. Hozirgi kunda ingliz tilini bilish har bir yo'nalishda yaxshi mutaxassis bo'lish uchun katta imkoniyat eshiklarini ochib bermoqda. Shuningdek bu davr talabiga ham aylanib ulgurdi desak mubolag'a bo'lmaydi. Ingliz tilini o'rganishning siz uchun qulay tomoni hayotingizning deyarli barcha jabhalarida yaxshi natija olish uchun sizni moslashtirish qobiliyatiga ega. Ingliz tilini yaxshi o'rganish juda muhimdir va chet tilini o'rganish uchun ko'plab shunday sabablar mavjud. Demak ingliz tilini bilish biz uchun dolzarb bo'lsa, uni qanday tez va puxta o'rgana olamiz? Uzoq yillar davomidagi izlanishlar natijasida shuni ko'rish mumkinki, muammoning sababi til o'rganishga bo'lgan yondashuvdadir. Chet tilini o'rganish bu biz xayolimizga sig'dirganchalik qiyin emasligini kundan-kunga yaxshiroq anglab bormoqdamiz. Bu uchun muhimi chet tilini o'rganishda eng qulay yo'lni tanlab bilishdir. Tilni o'rganish bugungi kunda o'qituvchidan ko'ra aynan til o'rganuvchi o'quvchining o'ziga ko'proq bog'liq bo'lib qoldi.



Kuchli motivatsiya

Har qanday tilni o'rganish uchun eng asosiysi hayotdagi barcha yo'nalishda bo'lganidek ishtiyoq. Bu motivatsiya bizning tilini o'rganishga qo'ygan maqsadimiz hisoblanadi. Sizning bu maqsadingiz qachonki siz tilni o'rganish paytida zerikish yoki charchash hissini sezganingizda sizni bu to'siqlardan olib o'tadi. Demak, siz o'zingizning ruhiy olamingizni til o'rganishga tayyorlasangiz, o'zingizga bo'lgan ishonchingizni oshirsangiz ya'ni fikringizni yaxshi maqsadlar bilan to'ldirsangiz yaxshi natijalarga erishasiz.

Kunlik mashg'ulot

Ko'pgina til kurslari haftada bir yoki ikki kun bir yarim-ikki soatdan dars tashkillashtiradi va kundalik ishlari bilan band bo'lgan til o'rganuvchi kishi boshqa kunlarda tilga vaqt ajratolmaydi va keyingi darsgacha oldingi darsdagi mavzularni esdan chiqaradi va bu tilni o'rganish jarayonini ancha sekinlashtiradi. Shu uchun ham xohlagan bir chet tilini o'rganayotganda, uni har kuni individual o'rganish kerak va shunda har kuni takrorlanish natijasida tilni o'rganish jarayoni ancha tezlashadi.

Lug'at yodlash

Har qanday chet tilida tez orada yaxshi gapirish uchun albatta sizda ko'p lug'at boyligi bo'lishi kerak. Lug'atlarni har kuni 20-30tadan yodlab lekin 1hafta o'tmay ularni esdan chiqarib yuborish holati barchamizga ma'lum. Demak, nima qilish kerak? Siz lug'at yodlaganda ularni asosan gaplarda qo'llashga va interaktiv suhbatda ishlatishda harakat qiling. Men sizga smartfoningizda oson ishlatiladigan "Wisdom dictionary" va "OALD" ilovalarini lug'at yodlash uchun taklif qilaman. Bu ilovalarda so'zlarning tarjimasi bilan ularni gaplarda qanday strukturalarda qo'llanilishi o'rgatadi. Siz so'zlarni gaplarda ishlatganingizda esingizda qolish imkoniyati oshadi va gapda qo'llash yo'llarini o'rganasiz.

Grammatika

Chet tillarni o'rganishda o'rganuvchiga eng yoqmaydigan va zerikarli narsasi bu grammatika hisoblanadi. Siz oylab, yillab grammatika kurslariga borasiz va amaliyotda qo'llanilmaydigan ko'pgina qoidalarga duch kelasiz. Har qanday tilni o'rganishda eng sodda yo'ldan borish kerak. Shu uchun ham e'tibor bering: chet tillarida asosan sodda gap nimalardan iborat? Ega+Kesim+To'ldiruvchi. Demak, gapning shu qismlarida ishlatiladigan grammatikani o'rganish tilni o'rganish uchun



yetalidir. Har qanday tilni o'rganishdan maqsad shu tilda gapira olishdir. Shu tomondan kelib chiqqanda, grammatikani o'rganish siz uchun taxminan 80 foizga osonlashadi. Grammatikani o'rganganda tilga eng kerakli mavzularni tanlab olgandan so'ng ularni o'rganib chiqishni haftalarga taqsimlab oling. Har bir alohida mavzuga bir haftadan vaqt ajrating va hafta davomida bir mavzuni chuqurroq o'rganib boring. Natijada, uch oyda chet tilida gapira olish uchun yetarli darajada grammatik asosga ega bo'lasiz va ko'rganingizdek bu siz o'ylaganchalik ham murakkab narsa emas.

So'zlashgichlar yordami

Chet tilni o'rganishni osonlashtirishning yana bir yo'li, bu chet tilidagi tayyor so'zlashgich yoki gidlardadir. Bugungi kunda hatto oddiy smartfoningizda ham ko'plab chet tilida turli holatlarda ishlatiladigan tayyor gaplardan iborat gid so'zlashgichlar va ijtimoiy tarmoqlarda til kurslarini o'rgatuvchi turli videolar bor. Aynan shu gidlarda siz tilda ishlatiladigan tayyor gaplarni yodlab olishingiz mumkin. Bu gaplar sizni chet tilida so'zlashishingizni ancha osonlashtiradi. Chet tilini o'rganish bo'lsa o'quv markazlari va o'qituvchilardan ko'ra bugun faqat va faqat sizga bog'liqdir. Texnika taraqqiyoti evaziga, bugun ishonch, ishtiyoq va to'g'ri tanlangan metodikaning o'zi chet tillarini o'rganish uchun yetarli.

Kimlar bilan chet tilida gaplashaman?

Tabiiyki shunday savol tug'ilishi mumkin: "Xo'p", siz aytgan narsalarni barchasini qildik. Lekin, tilni gapirish uchun nima qilishim kerak? Kim bilan chet tilida gaplashsam bo'ladi? Og'zaki nutqimni qanday qilib o'stirsam bo'ladi?" Buning javobi borib bugungi ijtimoiy tarmoqlarga taqaladi. Ijtimoiy tarmoqlarida bugun tili o'rganilayotgan mamlakatdan do'st orttirish juda oson holat bo'lib qoldi. Lekin, o'rganishning eng oson yo'li bu xato qilishda ekanligini psixologlar isbot qilishgan. Shu uchun xato qilishdan qo'rqmasdan, chet tilida gapirishga harakat qilish kerak va shu orqaligini xato qilish natijasida o'z kamchiliklaringizni tushunib borasiz va maqsadni keyin aynan shu kamchiliklarni to'g'rilashga qaratasiz. Eng asosiysi, xatodan uyalmasdan chet tilida gapirish. Men ham o'tgan yillarda chet tilida gapirish uchun bir necha marta "qovun tushirganman", hatto butun boshli gruppada oldida kulguga qolgan davrlar bo'lgan. Lekin, bilasizmi, o'sha xatolarni qilmaganimda, xatolarimni bilmaganimda bugun tilni shu darajada o'rgana olmasdim. Siz chet



elliklar bilan tashkillashtirilayotgan ma'lum bir tadbir ishtirokchisiz, siz bilan suhbatda bo'lgan chet ellik qiynalib, xatolar bilan bo'lsada sizning tilingizda gapiryapti. Shu holatda, siz uning xatolari uchun unga past nazar bilan qaramaysiz, aksincha o'zingizni tilingizni o'rganayotganligi uchun, unga nisbatan hurmatingiz ortadi, xursand bo'lasiz va uni xatolarini tushunasiz. Demak, chet elliklar bilan ularning tilida suhbat qilish davomida, ular sizning xato qilishingizni tabiiy qabul qilishadi va ularning tilini o'rganayotganingizdan xursand ham bo'lishadi. Shu uchun ham xato qilishdan qo'rqmang.

Xulosa qilib aytadigan bo'lsam, chet tillarni bilish har bir soha vakili uchun yangi imkoniyatlar kalitidir. Siz sohangizni yaxshi bilsangiz bitta eshik, chet tilini ham bilsangiz yana bir eshik ochiladi.

QUICK AND EFFECTIVE WAYS OF LEARNING FOREIGN LANGUAGES

Abstract

The article shows how to start learning foreign languages and how to learn quickly and effectively. You can also get information about the role of innovative technologies in language learning.

Keywords: interactive method, motivation, interactive conversation, individual, "Wisdom dictionary", "OALD", structure.

БЫСТРЫЕ И ЭФФЕКТИВНЫЕ СПОСОБЫ ИЗУЧЕНИЯ ИНОСТРАННЫХ ЯЗЫКОВ

Аннотация:

В статье показано, с чего начать изучение иностранных языков и как научиться быстро и эффективно. Вы также можете получить информацию о роли инновационных технологий в изучении языка.

Ключевые слова: интерактивный метод, мотивация, интерактивная беседа, индивидуум, «Словарь мудрости», «ОАЛД», структура.

FOYDALANILGAN ADABIYOTLAR

1. Jalilov J. Chet tili o'qitish metodikasi, Toshkent .2012
2. Джалолов Д.Д., Методическая разработка для групповых руководителей
3. Djumaqulov A. A.The diffirence modular teaching texnlogy and traditional teaching, 2020.
4. Adilova S. ,Xidralieva Z.Pedagogika ilmiy nazariy va metodik jurnali,"Tahrir va nashr".2017.

